



Акафист преподобному Ферапонту Можайскому, Лужецкому чудотворцу

Кондак 1

Возбранному Воеводе и Господу Иисусу
последствуя, молитвою, постом и труды
плотския страсти победил еси: темже, яко добр
воин, увенчался еси от Царя Христа, Егоже
непрестай тепле молиши о нас, рабех твоих,
преподобне, да тобою избавльшися от бед,
присно поем ти:

Радуйся, Ферапонте, угодниче Христов и
чудотворче.

Икос 1

От младенчества твоего и даже до престарения,
телом и душею работал еси Господу Иисусу
Христу и Пречистой Его Матери, и се ныне душа
твоя ликовствует в Его небесных обителях, тело
же твое zde поживая, сияет чудесы. Сего ради
вопием ти радостно:

Радуйся, во след Христа неуклонно шедый.

Радуйся, слово Его соблюдавый твердо.

Радуйся, во славу Христа Бога подвизавыйся.

Радуйся, Пречистую Христа Матерь неумолчно

славивый.

Радуйся, от Христа и Матери Его
прославленный.

Радуйся, имый дерзновение велие ко Христу.

Радуйся, защитниче обители Лужецкия.

Радуйся, хранителю страны Можайския.

Радуйся, поборниче крепкий за державу
Российскую.

Радуйся, добропобедный воине Православныя
Церкве.

Радуйся, всем призывающым тя подающий
скорую помощь от Христа Бога.

Радуйся, Ферапонте, угодниче Христов и
чудотворче.

Кондак 2

Пребывая в житейстей молве, не усладился еси
благими, ниже опечалился еси злыми мира сего,
но взирая к почести вышняго звания, под
бременем мирских сует памятовал еси всегда
пети Богу: Аллилуиа.

Икос 2

Усердно делая дела мирскаго служения твоего,
преподобне, едино точию имел еси в сердце
твоем: да не осужден предстанеши на страшнем
Судищи Господа Славы, и ныне благочестно к
тому себе предъуготовав, слышиши от всех:
Радуйся, ум твой вперивый в горняя.

Радуйся, от мира тленного к нетленному очи
возведый.

Радуйся, паче земных благ возлюбивый нищету
духовную.

Радуйся, в печали о гресех снискавый себе
утешение.

Радуйся, кротостию благоукрасивыйся.

Радуйся, в заповедях праведности пред Богом.

Радуйся, согревающим благоснисходительный.

Радуйся, страдающим сострадавый тепле.

Радуйся, ко всем благоприветливый.

Радуйся, всем ведущим тя прелюбезный.

Радуйся, милостыни подававый щедро.

Радуйся, Ферапонте, угодниче Христов и
чудотворче.

Кондак 3

Да не злоба изменит твоего благаго разума,
тайно от присных твоих отшел еси во святую
обитель блаженного Феодора, да тамо свободь
мирских сует, поспоеши Богу: Аллилуиа.

Икос 3

От Бога наученный о тебе блаженный Феодор
уразуме тя, уже искушенна в посте и молитве,
радостно прият тя во обитель свою, и в день
пришествия твоего к нему облече тя в чин
иноческий, со всеми сподвижники своими
вопия тебе:

Радуйся, вся красная мира презревший.

Радуйся, от мира льстиваго излетевый, яко птица от сети.

Радуйся, паче Богу, нежели человеком, работати избравый.

Радуйся, иночество ради добраго Богу делания приявый.

Радуйся, яко уже в мире инок искусен уготовался еси.

Радуйся, всего ся Христу, яко чистую жертву, принесый.

Радуйся, ради Христа отвергийся себе самаго.

Радуйся, Христов Крест подъявый истинно.

Радуйся, со Христом быти присно возжелавый.

Радуйся, Христа Бога всею душею возлюбивый.

Радуйся, Христу Богу возлюбленный.

Радуйся, Ферапонте, угодниче Христов и чудотворче.

Кондак 4

Старцу, емуже вручен был еси, яко отцу работал еси, исповедая же ему на всяк день грехи твоя, прогонял еси от себе лукавья помыслы, сего ради с ним чистым сердцем вопиял еси Богу: Аллилуиа.

Икос 4

Подвигом иночества добре подвизаяся, не мнил еси тя доброе что сотворша, но мнил тя

непотребна быти, и припадая стопам спостников твоих, слезно молил еси их, умолити Пречистую Богородицу, да спасет тя от геенны огненныя. Сие ведяще, вопием ти:

Радуйся, слезами покаяния очистивый душу свою.

Радуйся, низложивый в себе духа гордыни.

Радуйся, научивыйся зрети твоя точию согрешения.

Радуйся, не осуждавый ни единого от согрешавших.

Радуйся, братолюбием утишавый прекословия.

Радуйся, ко всем в послушании вдавый тя неуклонно.

Радуйся, молитвами братии подкрепленный.

Радуйся, не на тебе самаго, а на Пречистую Богородицу уповавый.

Радуйся, во всех трудех твоих благословенный от Пречистыя Богородицы.

Радуйся, заступницу себе стяжавый Благословенную Матерь Христа Бога.

Радуйся, Ею от вечныя муки свободенный.

Радуйся, Ферапонте, угодниче Христов и чудотворче.

Кондак 5

В той же обители блаженнаго Феодора имел еси равнолетна тебе друга, спостника и сомолитвенника, преподобнаго Кирилла, с ним

же, от преподобнаго Сергия наученный, едином сердцем и едиными усты, непрестанно пел Богу: Аллилуиа.

Икос 5

Спостницы твои, видевшие тя, зело преспевающа в добром иноческом житии, в смирении и послушании, в целомудрии и братолюбии, славиша Бога и Пречистую, давших ти таковую благодать, мы же, уведевше о сем, вопием ти: Радуйся, иноче, иноков похвало.

Радуйся, спостниче преподобнаго Кирилла.

Радуйся, верный учениче преподобнаго Сергия.

Радуйся, целомудрия образ явивый собою истинный.

Радуйся, пощением укрепивый сердце твое.

Радуйся, бдением окриливый душу твою.

Радуйся, молитвами твоими благоухающий Богу.

Радуйся, ангельския чистоты рачителю.

Радуйся, херувимскаго богомыслия подражателю.

Радуйся, серафимския к Богу любве ревнителю.

Радуйся, Ферапонте, угодниче Христов и чудотворче.

Кондак 6

Обходя страну Белозерскую, обрел еси многая места красная и удобная, во еже тамо в

конечнем безмолвии пребывати. И возжаждал еси сего безмолвия, да в нем втайне Богу зовещи: Аллилуиа.

Икос 6

По гласу Пречистыя пришед в страну Белозерскую со другом твоим, преподобным Кириллом, создал еси не далече от него в дебрех безмолвную келлию, да в ней втайне усугубиши труды твоя пред Богом. Мы же, уведевше я, вопием ти:

Радуйся, ради Бога возжаждавый тишайшаго безмолвия.

Радуйся, устройением Пречистыя приведенный в пустыню со другом твоим.

Радуйся, со едином точию другом твоим разделявый безмолвие пустыни.

Радуйся, и от сего друга разлучивыйся, да с едином Христом будещи.

Радуйся, пустынною келлиею паче чертога веселивыйся.

Радуйся, в ней дни в трудах, нощи же в бдениих проводивый.

Радуйся, ради Христа от тяжких к тяжчайшим трудом устремлявыйся.

Радуйся, тайнаго делания пред Отцем Небесным достигнувый.

Радуйся, гласом твоим молитвенным огласивый дебри пустынные.

Радуйся, немолчно твоими усты славивый имя Христово.

Радуйся, в уме и сердце имевый Иисуса Сладчайшаго.

Радуйся, Ферапонте, угодниче Христов и чудотворче.

Кондак 7

Разбойников ярость нищетою и терпением посрамил еси, нощных птиц клики и зверей шатание победил еси верою во Христа, труды же неусыпными до конца сокрушил еси похоти и немощи плотския, немолчно вопия Богу:
Аллилуиа.

Икос 7

Далече зело слышано бысть богоугодное житие твое, преподобне. И от конец земли Русския притекоша к тебе любящии безмолвие. Ты же сих приемляй с любовью, яко отец о обращении заблудших чад радовался еси. Темже и мы вопием ти:

Радуйся, древних отцев пустынножителей подражателю.

Радуйся, зной, хлад и глад в пустыни с терпением понесый.

Радуйся, тяготу дневную и страх нощный любовью ко Христу победивый.

Радуйся, не устрашивыйся ни зверей дивиих, ни

злых человеков.

Радуйся, доблий низложителю искушений
диавольских.

Радуйся, за тайныя твоя подвиги в пустыни для
Бога прославленный от Бога яве.

Радуйся, яко и в пустыни Господь содела тя
вождя ищущым спасения.

Радуйся, благоукрашивый пустыню обителию
иночествующих.

Радуйся, неискусных иноков добрый вождю ко
Христу.

Радуйся, освятивый пустыню устройением храма
Божия.

Радуйся, в храме со ученики твоими воспевавый
Богу радостно.

Радуйся, Ферапонте, угодниче Христов и
чудотворче.

Кондак 8

Слышав о тебе и о сподвижницех твоих,
преподобне, благоверный князь Андрей всем
сердцем вознесе хвалу Богу, благословившему
отчину его таковыми обитательми, и воспе
радостно Богу: Аллилуиа.

Икос 8

Возжела благоверный князь Андрей прияти
благословение от святыни твоея, преподобне, и
пригласи тя во свой град, ты же, молению его и

братии повинуюся, лета старости и труд
далечайшаго пути презрев, скоро ко князю
притекл еси слышай от него:

Радуйся, леты, наипаче же благомудрием
украшенный.

Радуйся, подвижнице Христов неизменный.

Радуйся, Духа Святаго преисполненный.

Радуйся, Материю Бога возлюбленный.

Радуйся, имени Ея обитель иноков создавый.

Радуйся, стаду твоему образ истинный.

Радуйся, чадолюбивый отче иноков.

Радуйся, иноки твоими любимый, яко отец
чадолюбивейший.

Радуйся, всех притекающих к тебе исполняяй
радости.

Радуйся, всем подавай скорое утешение.

Радуйся, любви и мира насадителю.

Радуйся, Ферапонте, угоднице Христов и
чудотворче.

Кондак 9

Радостию возрадовася благоверный князь
Андрей, видев твое к нему пришествие и, да не
разлучится с тобою, молением умоли тя, близ
него создати новую обитель иноков, в нейже бы
выну пети Богу: Аллилуиа.

Икос 9

Аще бо зело отрицался еси, обаче, не князю
точию, но Самому Богу повинуюся, на месте
краснем близ града Можайска создал еси храм
Пречистыя и новую обитель иноков, имже сам в
наставника был еси до конца дней твоих, темже
слышиши от всех:

Радуйся, благое желание князя благоверного
совершивый мудре.

Радуйся, вторыя своя обители иноков во имя
Богоматери учредителю.

Радуйся, в сию обитель собравый множество
спасающихся.

Радуйся, насадителю в ней добраго жития.

Радуйся, напоивый ю твоими наставлении.

Радуйся, возрадивый ю многими слезами
твоими.

Радуйся, яко многими труды и благими подвиги
твоими благоукрасил еси ю.

Радуйся, яко молитвами твоими твориши ю
чисту невесту Христову.

Радуйся, радостно предавый в ней Христу душу
твою чистую.

Радуйся, телом твоим пребываяй присно в сей
обители твоей.

Радуйся, из нея сияй мирови чудесы.

Радуйся, Ферапонте, угодниче Христов и
чудотворче.

Кондак 10

Чистая душа твоя, преподобне, многими подвиги и скорбьми усугубившая своя таланты, принесе к Давшему я Богу, и вниде в радость Господа своего, ныне вопиющи Ему радостно: Аллилуиа.

Икос 10

Аще и до конца дней твоих не преставал еси желати возвращения твоего в первую твою обитель, Белоезерскую, но притекл же к первейшей и вождеденнейшей обители небесней, оставил еси в покров и защиту вторья обители твоея, Лужецкия, святое тело твое, имже хранимии зовем ти:

Радуйся, на земли поживый равноангельно.

Радуйся, на небеси ликующий со ангелы.

Радуйся, на небеси вчиненный со всеми святыми.

Радуйся, на земли чудесы прославленный.

Радуйся, верный хранителю обители, в нейже почивает тело твое.

Радуйся, избавляяй обитель сию от разрушения.

Радуйся, смиряяй в ней врагов иноплеменных.

Радуйся, низлагаяй всех ея видимых и невидимых враг.

Радуйся, всякия напасти от нея прогоняяй.

Радуйся, подаяй нам молитвами твоими вся благопотребная к вечней жизни.

Радуйся, разрушителю вражды и насадителю братолюбия.

Радуйся, Ферапонте, угодниче Христов и чудотворче.

Кондак 11

Образ был еси стаду твоему во всем и явился еси всем, грядущим с тобою ко Христу по тесному пути, вождь к вечней славе, в нейже ныне со всеми святыми вопиеша Богу: Аллилуиа.

Икос 11

Пение наше тебе побеждается обилием и величием подвигов и всяких добродетелей и чудес твоих. Обаче любовию к тебе горящии, молчати не могуще, молим: приими от нас сицевыя, аще и вельми скудныя, похвалы: Радуйся, образе смирения, кротости и послушания.

Радуйся, похвало девствующим.

Радуйся, в душевных подвизех и в телесных трудах помощниче наш.

Радуйся, исцеляяй нас от страстей.

Радуйся, врачу скорый в недужех и болезнех.

Радуйся, заступниче сирых и всех обидимых.

Радуйся, утешителю наш в скорбех и бедах и всяких напастех.

Радуйся, от огня и от потопления избавляяй нас.

Радуйся, питателю наш во дни глада и скудости.

Радуйся, подавай нам обилие плодов и благорастворение воздухов.

Радуйся, яко Бога твориши ко всем нам милостива твоими ходатайствы к Нему.

Радуйся, Ферапонте, угодниче Христов и чудотворче.

Кондак 12

Поюще твое по Бозе житие, твой иночествуящим образ, и всем твою, преподобне, помощь благодаряще, славим прославльших тя, Бога и пречистую Богородицу, и вопием Им с тобою: Аллилуиа.

Икос 12

Проповедник Православия явился еси, преподобне, граду твоему и окрестней стране, и далече от них молитвами твоими упраздняеши всякая учения лживая льстивых и лукавых человеков, мы же с тобою в правой вере утверждаемии вопием ти:

Радуйся, правило веры Христовы.

Радуйся, образе истинный любви к Богу.

Радуйся, неусыпный пастырю стада Христова.

Радуйся, нечестия обличителю.

Радуйся, низложителю зловерных.

Радуйся, утверждение верных.

Радуйся, всем православным охранителю.
Радуйся, всем заблуждающим подай скорое
исправление.
Радуйся, тму неверия разгоняй.
Радуйся, всех приводяй ко Христу Богу.
Радуйся, Ферапонте, угодниче Христов и
чудотворче.

Кондак 13

О преблаженне и досточудне отче наш
Ферапонте! Всех нас, ныне тебе усердно
молящихся, от бед и вечных мук избави,
приятными Богу твоими молитвами, да поем с
тобою Богу: Аллилуиа.

*Этот Кондак читается трижды, затем Икос 1-
й и Кондак 1-й*

Молитва

О всечестный и преблаженный отче наш,
Ферапонте! Тебе дадесе благодать молитися о
нас, и вемы, яко предстоя Престолу Господа,
присно являеши любовь твою к нам
непрестанными о нас твоими ходатайствы. Но
понеже мы ежечасно умножающе грехи наша,
крайняго твоего отвращения достойни
сотворихомся, сего ради в покаянии, со слезами
припадающе, молим тя: не премени твоея
милости к нам на гнев за нечестия и скверны

наша, яви убо нам милость твою до конца и согрешающих нас очисти твоими молитвами, возведи к покаянию, укрепи на дела благая, сохрани в православии и во всякой святыни. Даруй нам пребывать в мире, тишине и братолюбии, испроси нам времена безмятежна и изобилие плодов земных, избави от огня и от потопления и от лютых болезней и от смертоносных язвы. Посли труждающимся благий успех, путешествующим путь безпреткновенный, в мори плавающим пристанище тихое, плененным ослабу и освобождение, сирым помощь и заступление. Умоли Бога: страждущую страну Российскую от лютых безбожников и власти их Господь да свободит, и да возставит престол православных правителей; верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш; да любовью твоею огражденнии, благодарственная всегда поем, прославившему тя, Господу Иисусу Христу, Ему же подобает всякая слава и честь, со Безначальным Его Отцем и с Пресвятым и Животворящим Его Духом во веки веков. Аминь.